

堅

瓠

集

堅瓠六集卷之三目錄

少陵詩意

憂美圖

潮鳴寺

瑤華洞仙

符武功

張翰知幾

望夫石

戒殺女歌

遣妾追送

淬鐵

刑戒

燒梨賜泌

賢女廟

朱買臣廟

養塚

董湯辭受

石曼卿詩

江心寺火

黃山谷奕碁

四傑

虞伯生像

七里灘壁詞

朱夢得靜鎮

烏衣國

戎昱送妓詩

田家樂

勸農詞

退隱

白香山罷郡

山中宰相

題淵明像

車馬驚猜

溫公詞

廣寒遷客

紅香仙子

狐柳妖

劉山叟訪女

花樣不同

下第集句

人心難足

聽讒詩

朝鮮國人

楊誠齋詩

無名氏詩

詩意相似

觀潮

釘詩

四不出

登溷詩

萬回萬拜

王琪張亢

鷓且打鳳

姓伍相美

羅江雞卵

池中飛來

儒匠

楊鑾詩

殘羊曾客

衆鳥欣有托

草明堂赦文

貧家壁

堅瓠六集卷之三

甬上留香閣主人較刊

少陵詩意

鶴林玉露杜少陵詩莫笑田家老瓦盆自  
從盛酒長兒孫傾銀注玉驚人眼共醉終  
同卧竹根蓋言瓦盆盛酒與傾銀壺而注  
玉盃者同一醉也出是推之蹇驢布韉與  
駿馬金鞍同一遊松床篋簞與繡帷玉枕

同一寢知此則貧賤富貴可以一視矣  
有僕嫌其妻之陋者主人聞之召僕至以  
銀盃瓦盞各一酌酒飲僕問曰酒佳乎對  
曰佳曰銀杯者佳乎瓦盞者佳乎對曰皆  
佳主人曰盃有精粗酒無分別汝旣知此  
則無嫌於汝妻之陋矣僕悟遂安其室少  
陵詩意正如此

元人題夢奠圖詩云婦人心計太奸深冷  
飯殘羹值萬金早識叔爲天子貴添鹽添  
醋也甘心愚謂婦性慳吝何足深責而塵  
埃天子物色實難史稱高帝豁達大度顧  
以丘嫂羹盡輒舍之然而兄子信獨不侯  
太上皇以爲言始封爲羹頡侯皇帝帶礪  
之詞而遷怒之跡存焉獨不畏太上皇緣  
此記分羹之語乎○考括地志羹頡山在



鳩州懷戎縣東南十五里

潮鳴寺

山堂肆考宋高宗作詩賜統制劉漢臣云  
野水參差落漲痕疎林欹倒出霜根扁舟  
一棹向何處家在江南黃葉村勒石潮鳴  
寺中寺在杭州慶春門外高宗南渡駐驛  
寺中聞江濤聲以爲金兵追至駭之已而  
問知其故遂賜潮鳴寺

瑤華洞仙

洪武辛酉福清林子羽湯爲將樂縣訓導  
與客遊玉華洞酒酣藉草而卧夢入瑤華  
洞天洞主之三女小字芸香延入天葩軒  
案有詩集題曰霞光女郎曰嚴君階列地  
仙職司文衡凡文人才子之詩皆錄集中  
以備上帝御覽妾見君詩數十首至一身  
鏡天淨萬花潭雨香與檄雨古壇暝禮星

寒殿開之句尤嚴君所稱賞也因揮翰賦詩留連而覺翌日避客獨遊夢徑宛然石壁阻絕潭深莫測鴻書一詩投之如炊黍許見蠅箋浮出上有詩云天葩小院徹銀屏鵲散天河逗客星欲識別來幽意苦晚峯長想黛眉青鴻覽畢諷詠不置循所得箋乃一黃葉字亦隨滅矣子羽有記甚詳則是張紅橋而外又有此詩過也

徐武功

徐天全

有貢

自金齒回放情山水日與耆

俊遊樂其遊靈巖山作水龍吟慢云佳麗  
地是吾鄉看東山更比西山好有卷書樓  
臺金碧巖扉彷彿十洲三島却也有風流  
安石清真逸少向西施洞口望湖亭畔對  
雲影天光上下相涵相照似寶鏡裏翠娥  
粧曉且登臨且談笑眼前世事幾多堪弔

香徑踪消，廊聲杳，麋鹿還遊未了也。莫  
管吳越興亡，爲他煩惱，是非顛倒，歎宦海  
風波，幾人歸早。得在家中，老遇酒，美花新  
歌，清舞妙，儘開懷抱。又何須較短論長，此  
生心應自有。天知道，醉呼童，更進餘杯，便  
捱得到三更，乘月歸仙棹。詞藻發意氣  
凌轍，至立朝經濟，隨試輒效，洵天才也。第  
於于忠肅事，不能免於公議云。

張翰知幾

晉張翰仕齊王罔不樂於官一日見秋風  
忽起作歌曰秋風起兮佳景時吳江冷兮  
鱸正肥三千里兮家未歸恨難得兮仰天  
悲遂棄官而歸宋王贊運使過吳江有詩  
云吳江秋水灌平湖水濶烟深恨有餘因  
想季鷹當日事歸來未必爲蓴鱸謂翰度  
時不可爲飄然遠去非爲鱸也至東坡三

賢贊則曰浮世功名食與眠季鷹真得水  
中仙不須更說知幾早只爲尊鱸也自賢  
其說又高一着矣又嘗見蟬精倚載一詩  
云黃大東門事已非華亭在沃漫思歸直  
須死後方回首誰肯生前便拂衣此日區  
區求適志他年往往見知幾不須更說尊  
鱸美但在淞江水亦肥此過二詩而兼得  
之惜不知誰作

望夫石

湖廣武昌山有石狀如人相傳貞婦之夫  
遠征妻攜其子登山望之遂化爲石後人  
有詩曰一上青山便化身巍然翹首望江  
濱古來節婦皆銷朽獨爾不爲泉下塵王  
建詩云望夫處江悠悠化爲石不同頭山  
頭日日風復雨行人歸來石應語劉禹錫  
詩云終日望夫夫不歸化爲孤石苦相思



望來已是幾千載只似當年初望時郭功  
甫詩云杜鵑啼血春林碧妾有離愁思今  
昔上盡高山第一峰目亂魂飛化爲石化  
爲石可奈何淚懸白露衣薜蘿千古萬古  
望夫恨一江秋水寒蟬多漢家天子點征  
役良人荷戈歸不得此身未老將何從不  
似山頭化爲石按望夫石在處有之功甫  
一詩模寫殆盡

# 戒殺女歌

蘓東坡與宋鄂州書云昨武昌王殿直天  
麟見過言鄠岳間田野小人例只養二男  
一女過此則殺之尤諱養女以故民多鰥  
夫女初生輒以冷水浸殺之其父母不忍  
率閉目背面以手按之水盆中伊嚶良久  
乃死此風天下有數處聞之建陽崇安尤  
甚雖富家亦養二女爲極莆田周石梁戒

殺女歌云虎狼性至惡猶知有父子人爲  
萬物靈柰何不如彼生男與生女懷抱一  
而已生男則收養生女顧不舉我聞殺女  
時其苦狀難比胞血尙淋漓有口不能語  
吶嚶水盆中良久乃得死吁嗟父母心殘  
忍一至此我因勸吾民毋輕殺其女荆釵  
與裙布未必能貧汝隨分而嫁娶男女兩  
得所此歌散見聞諸姓當亂取

遣妾追送

元豐初金人議趙界丞相韓王汝綽自樞  
密院承旨出分畫將行與愛妾劉氏飲宴  
通夕且作樂府詞留別翌日神宗密知中  
批步軍遣人般家追送之王汝初莫測所  
因久之方知自樂府發也劉貢父王汝姻  
黨寄詩戲之云驃姚不復顧家爲誰謂東  
山久不歸天聽幸客猶婉嬾皇華何嘗有

光輝玉汝之詞由此亦盛傳天下

淬鐵

宋歐陽程永州府營道人少爲郡吏郡後有池常淬鐵爲戍器名鐵作池植亭其旁一口太守於吏讀圖得詞紙記池亭之勝有寒影倒春凌漢樹冷光高浴半天星之句問知爲程詩大驚異之與之金使歸爲學登進士第舉官屯田員外郎

## 刑戒

古語云教答不可廢於家扑責不可弛於國奴僕有犯除情重送官外用小竹板扑之勿腳踏亂打而頭目腰背要害之處尤當禁忌百姓有犯除強盜人命外用二號竹板責之勿用夾棍極刑如婦人不得已止撥其手勿決其鬢呂叔簡有刑戒八章一曰五不打老不打幼不打病不打衣食

不繼不打人打我不打二曰五莫輕打宗  
室莫輕打官莫輕打生員莫輕打童生莫  
輕打婦人莫輕打三曰五不就打人急勿  
就打人忿勿就打人醉勿就打人隨遠路  
勿就打人跑來喘息勿就打四曰五且緩  
打我怒且緩打我醉且緩打我病且緩打  
我見不真且緩打我不能處分且緩打五  
曰三莫又打已投莫又打已夾莫又打要

枷莫又打六曰三憐不打嚴寒酷暑憐不  
打佳節良辰憐不打人方傷心憐不打七  
曰三應打不打尊長該打與卑幼訟不打  
百姓該打與衙役訟不打工役舖行該打  
爲修理衙門及買辦自用物不打八曰三  
禁打禁重杖打禁從下打禁佐貳非刑打  
仁人之言性暴者宜書座右

燒梨賜泌



唐肅宗眷愛李泌以泌絕粒每燒梨以賜  
之一日與諸王夜坐自燒二梨與泌諸王  
戲奪之上止之曰先生不食穀汝何爲也  
既而諸王請聯句以爲他年勝事潁王曰  
先生年幾許顏色似童兒信王曰夜抱九  
仙骨朝披一品衣岐王曰不食千鍾粟惟  
食兩顆梨請上成之上曰天生此間氣助  
我化無爲

賢女廟

宋安軍賢女廟蔡氏女也父母初許適蕭  
氏蕭貧再許陳又貧復他許女遂抱石投  
水死鄉人立廟祀之淳祐間劉賢題詩悼  
之曰贏得賢名萬古稱痛憐此女太輕生  
春風楊柳因誰舞秋雨梧桐底事聲髣髴  
雲鬟拋岸久依稀月魄浸潭明何如約我  
桃源去免使雙親淚眼盈是夜夢女和其

詩覺而不能記憶矣

朱買臣廟

嚴州壽昌縣道旁有朱買臣廟朱朱謙之  
題詩云貧賤難堪俗眼低區區何事便雲  
泥會稽乞得無他念祇爲歸來詫故妻又  
採薪行道自歌呼越俗安知有丈夫一見  
印章驚欲倒相看方悔太模糊

羞塚

宋會稽郡守周卯題朱尉臣婦羞塚云當年一棄會稽侯野墓烟蘿鎖別愁惆悵不逢郎衣錦至今粉骨尚含羞又方孝孺題云青草塘邊土一坵千年埋骨不埋羞丁寧囑付人間婦自結糟糠合到頭

董湯辭受

高宗紹興二十六年秦檜病篤召叅知政事董德元僉樞密院事湯思退至臥室屬

以後事各贈黃金千兩德元慮檜以爲自  
外不敢辭思退以爲期其死不敢受帝聞  
思退不受以爲非檜黨遂信任之至左僕  
射侍御史故古樂府云相門深深夜不扃  
百年恩重千金輕二人辭受本同情君王  
但賞辭金名嗚呼一檜死一檜生君王孤  
立臣爲朋誰人更問胡邦衡時胡銓兩論  
檜及思退主和誤國之罪言甚愷切

石曼卿詩

文公語錄云石曼卿題張氏園亭云亭館  
連城敵謝家四時園色闌明霞忽迎西渭  
封侯竹地接東隣隱士瓜樂意相關禽對  
語生香不斷樹交花縱遊會約無留事醉  
待參橫落日斜又籌筆驛詩云意中流水  
遠愁外舊山青句極佳曼卿爲人豪放胸  
次極高而詩乃方嚴縝密如此樂意二句

朱儒謂形得浩然之氣

江心寺火

張羅峯學敬弔江心寺火詩云愁見中川  
皆赤土却留雙塔自摩空眼前殺盡千年  
景江上無消半夜風幻化物情今日極浮  
沉天地有時窮咸陽宮殿都休問金谷銅  
駝也棘中此作氣象自與凡庸不同

黃山谷奕碁

黃山谷奕碁呈任公漸詩云偶因無事客  
休時席上談兵象兩碁心似鵝絲道碧落  
身如鰓甲化枯枝湘東一目誠堪死天下  
中分尙可持誰謂吾徒猶愛日參橫月落  
不曾知方萬里云山谷前詩云坐隱不知  
巖月樂手談勝與俗人言亦佳句碧落枯  
枝盡弄者用心忘身之態至東坡則云勝  
固欣然敗亦可喜優哉優哉聊復爾耳蓋



東坡素不解甚不究此味也

四傑

唐盧駱王楊四大家作者聞之歛手然猶  
互相譏誚如賓王漢宮三十六秦關一百  
二謂之筭博士盈川類取古人姓氏作句  
號爲點鬼簿照隣多用金玉翡翠珠璣等  
字謂之陽瞿大賈四傑作尙如此况今未  
造其藩籬者哉

虞伯生像

吳江虞奉家有邵庵三像一素冠竹杖一  
自書邈乎千載之贊一歸休戴笠圖自書  
四律今道園學古錄道園遺稿皆不載詩  
曰浮雲滿空無所依高岡獨立來者稀仙  
人冉冉遺松老鳴鹿呦呦生草肥伐木遠  
聞何處谷傾筐近得故時薇山中欲雨霧  
先合此日先生戴笠歸南園多竹暑氣

微遊來結屋相因依掛巾石壁晝霧濕冰  
髮池水朝陽晞頻年車馬踐霜雪六月裳  
衣無綵絺隣翁問舊坐來久此日先生戴  
笠歸老去懸車百慮灰西風獨愛菊花  
開田家酒熟邀皆去茅屋詩成嬾更裁欲  
及天清發沆瀣要觀日出上蓬萊赤松有  
約應相待此日先生戴笠來莫問鄉人  
駟馬車此身全不要人扶雲霄一羽山頭

杜風雨孤村海上蘓蕤命長鑣尋積雪多情破帽落輕鳥莫圍玉帶垂朱紱此是先  
生戴笠圖

七里灘壁間詞

朱文公云頃年過七里灘見壁間有胡明仲題詞刻石拈出子陵懷仁輔義之語以勵往來士大夫爲之摩挲太息後舟過石不復存或有惡聞而毀之也獨一老僧能

誦其詞爲予道之俾書之冊詞曰不見巖  
夫子寂寞富春山空留千丈危石高出暮  
雲端想象羊裘披了一笑兩忘身世來插  
釣竿寒肯似林間翮飛倦始知還中興主  
功業就髩毛斑馳驅一世人物相與濟時  
艱獨委狂奴心事未羨癡兒鼎足放去任  
踈頑爽氣動星斗終古照林巒或云此詞  
實先生所作也

朱夢得靜鎮

耳新信州朱夢得寶符性耿介有識量崇  
植戊辰舟過小孤風濤大作汪千頃誦觀  
世音垂救令朱亦誦夢得謝不應及大孤  
風十倍前更雨雹千頃以夢得篋中有楞  
嚴宜升之高處夢得以死生有數爲言頃  
之風定整帆達禦見港焚香向水謝口占  
一絕云白頭浪裏此心閒厭說存亡頃刻

間暗數平生纔一過危舟已過木孤山

身衣國

漁隱叢話王謝是二姓王導謝安之族所  
居名身衣巷或引劉斧撫遺所載唐王謝  
居金陵以航海爲業一日遇風舟破謝附  
一板抵一州見翁媼著皂服曰此吾主人  
郎也引至官內見王坐殿上王憐其才以  
女妻之因問女曰此何國女曰身衣國也

經月餘謝恩歸王設宴於寶墨殿以餞謝  
命作詩末句云恨不此身生羽翼王曰不  
能與君生羽翼亦可與君誇烟霧遂命取  
飛雲軒乃墨氈轎子令謝入其中閉目少  
息至家視之見梁上雙燕呢喃下視乃悟  
所至燕子國也至秋燕去謝乃附詩繫燕  
尾云誤到華胥國裏來主人終日獨憐才  
雲軒一去無消息淚洒春風幾百回來春



燕至女荅詩云昔日相逢冥數合只今睽  
遠是生離來春縱有相思字三月天南無  
雁飛來春燕果不來

戎昱送妓詩

戎昱刺浙郡郡有妓美艷善歌昱種愛之  
一日韓晉公召置籍中昱作詩送之云好  
去春風湖上亭柳條藤葛繫人情黃鸝久  
住渾相識欲別頻啼三兩聲

田家樂

閒居筆記有田家樂詞一書云沈石田作  
其語雖俚然有帝力何有於我之意錄之  
田家快活沒憂愁門前稻子沓成樓主人  
遇客先呼酒童僕逢人便可留雨落兒童  
拖草履晴乾嫂子戴烏兜有時一曲絕堪  
聽月子彎彎照九州田家快活沒嗟吁數  
椽茅屋儘堪居春養花蠶供衣服夏日焚

香檢道書秋畜黃雞肥啄黍冬春白米有  
盈餘朋友歡招堪置酒山餽野蔌也相宜  
田家快樂真不俗沉醉高歌自鼓腹門前  
雞犬亂紛紛地上桑麻花碌碌父慈子孝  
兩心寬兄弟恭如手足日高丈五睡正  
濃占斷八間天上福我見黎農三兩人勾  
肩搭背嬉笑行山歌拍手更相和傍花隨  
柳過前村我見黎農快活因自說村居不

厭貧自有宅邊田數畝不用低頭俯仰人  
雖無栢葉珍珠酒也有濁醪三五斗雖無  
海錯美精脩也有魚蝦供素口雖無細果  
似榛松也有葶薺共菱藕雖無蔴菰與香  
菌也有蔬菜與葱韭雖無歌唱美女娘也  
有村婦相伴守雖無銀錢多積畜不少飯  
兮不少粥雖無翠飾與金珠也有尋常粗  
布服煎鱗皮強似肉樂有餘自知足不能

琴聽彈孝行也賞心不能碁五花六直慣  
能移不能書牛契田繇寫有餘不能書印  
板故事滿壁挂花朝節年年賞花花不缺  
花前不放酒杯歇桃花盡盡開菜花香又  
來風雨時高歌酌酒掩柴扉牧童騎犢過  
村西風吹箬笠橫無腔笛韵清月明夜清  
光澹澹茅簷射有餽無酒鄰家借無板曲  
高歌猜奉幣一壺雪落天江上漁翁釣罷

還火箱煨熱坐團團片片飄來不覺寒四  
時快活容易過飢來吃飯困來眠米自舂  
酒自做紡棉花織大布野菜餛飩似肉香  
秧茅搭餅甜酒漿炒豆鬆甜兒叫娘有時  
車田跋小湊易背鯽魚大小有軟骨新鮮  
真箇肥勝似鮓魚與石首杜洗麩燻葫蘆  
煊莧菜糟落蘇蜆子清湯煮淡齏蔥花細  
切炙田雞難比羔羊珍羞味時常也得口

頭肥自說村居無限好自有地段種瓜棗  
自種槐花染淡黃自種紅花染紅襖自有  
菜油能照讀自有豆麥能罨醬自拉小園  
種細茶不用塘觔與播兩鄰家過說家務  
不願小小貴不願大大富自有船儘可渡  
自有牛不用催且吃蜚莫吃素黃脚雞鍋  
裏煨添些鹽用些醋買觔肉捆笋和煨芋  
芳煎豆腐沈沈吃到日將暮深缸湯軟草

舖且留一宿到明朝田家快樂真好過

勸農詩

謝良齋有勸農詩云莫入州衙與縣衙勸  
君勤理作生涯池塘多放旋添稅田地深  
耕足養家教子教孫須教義栽桑栽菜勝  
栽花閒非閒是都休管渴飲清泉困飲茶  
又云仕宦之人南州北縣商賈之人天涯  
海岸爭如農夫六親對面夏絹新衣秋米



白飯鵝鴨成群猪羊滿圈官稅早輸逍遙  
散誕似此之人值錢千萬氣象雍泰時不  
易逢若彼旱潦相仍飢餓憔悴如聶夷中  
所云寧不惻然乎○王元章勸農詩云雲  
擁旌旗出翠微勸農五馬去歸遲年年祇  
把親耕語說與山光水色知余介翁和云  
同井分田古意微租庸遺法亦凌遲欲耕  
多是無田者試問使君知不知

# 退隱

自警編云詩人類以棄官歸隱爲高而以  
軒冕榮貴爲外物然鮮有踐其言者唐僧  
靈徹泰酬韋丹詩云相逢盡道休官去林  
下何曾見一人白雲秀云住山人少說山  
多杜牧之云盡道青山歸去好青山能有  
幾人歸口爲懷山之言行爲媚寵之計古  
人已然何況今人哉趙嘏云早晚粗酬身

事了水邊歸去一閒人若身事了則仕進之心益熾愈無歸期矣王易簡云青山歸去且得去官職有來還自來是豈須更忘情軒冕乎張垂崖在蜀有一幕官不爲張所禮獻詩云秋光都似宦情薄山色不如歸意濃張謝而留之彼蓋有激而云筆談言有武人忽作詩云人生本無累何必買山錢遂棄官歸此最勇決者嘗於驛壁間

見題句云人生待足何時足未老得閒方  
是閒非深得其味者不能言也

白香山罷郡詩

白樂天喜罷郡詩云五年兩郡亦堪嗟偷  
出遊山走看花自此光陰爲已有從前日  
月屬官家樽前免被催迎枕上休聞報  
坐衙睡到午時歡到夜迴看官職是泥沙  
久困仕宦方味此詩之趣真樂天哉

山中宰相

梁陶宏景隱居華陽絕意仕宦人稱山中  
宰相武帝往見問之曰山中何所有宏景  
荅曰山中何所有嶺上多白雲但可自怡  
悅不堪持贈君後屢聘不出惟畫兩牛於  
壁一牛散於水草之間一牛着金籠頭有  
人執鞭以杖驅之帝曰此人欲效曳尾之  
龜豈可致之

題陶淵明像

元鄧善之題陶淵明像云詩中甲子春秋  
筆籬下黃花雨露枝便向斜川頻載酒風  
光不似羲熙時又貢泰父詩云竹杖芒鞋  
白鹿裘山中甲子幾春秋呼童黥檢門前  
柳莫放飛花過石頭明閩王典籍恭詩云  
束帶何須見督郵寧辭五斗便歸休秋風  
幾度黃花酒醉看飛鴻過石頭彭學士華

詩云解組歸來雪鬢飄呼兒滴露寫前朝  
丁寧莫取江頭水恐是金陵一夜潮沈石  
田詩云典午山河已莫支先生歸去自嫌  
遲寄奴小草連天綠剛剩黃花一兩籬五  
詩皆有韻致

車馬驚猜

王荊公辭相位退居金陵日遊中山脫去  
世故然其詩曰穠侯老擅關中事長恐諸

侯客子來我亦暮年專一壑每逢車馬便  
驚猜既以丘壑存心則任其外物去來何  
驚猜之有是知此老胸中尙芥蒂也如陶  
淵明則不然曰結廬在人境而無車馬喧  
問君何能爾心遠地自偏寄心於遠雖在  
人境而車馬不能喧之心有芥蒂則雖擅  
一壑而逢車馬亦不免驚猜也

溫公詞



人傳溫公西江月詞流播已久群談採餘  
又載錦堂春詞云紅日遲遲虛廊轉影槐  
陰迤邐西斜綵筆工夫難狀晚景烟霞蝶  
尚不知春去漫繞幽砌尋花柰猛風過後  
總有殘紅飛向誰家始知青鬢無價歎飄  
零官路在苒年華今日笙歌叢裡特地咨  
嗟席上青衫濕透笑感舊何止琵琶怎不  
教人易老多少離愁散在天涯

廣寒遷客

順治乙酉楊維斗先生廷樞隱居光福詠  
梅花十二韻和者甚衆有女子自稱廣寒  
遷客肩輿過門亦投和章急出詢之已遠  
逝矣其詩云栽遍山中不記年却於松竹  
有溪緣寒香和月來窻外踈影因風到水  
邊細雨微濛珠有淚斜陽黯淡玉生烟初  
無綠葉侵書幌亦有紅英入硯田曾向羅

浮尋舊約會從姑射見餘妍  
下秋高潔凌瑤島一片空明漾碧川  
玉貌瘦來骨更冷  
水魂斷處夢初圓  
心期澹靜孤嫠節標格  
清癯處士禪  
醉後漫將茶共嗅  
吟餘可與雪同咽  
廣寒桂樹差堪侶  
閨苑瓊枝未是仙  
樓上乍驚吹笛韻  
囊中猶剩買花錢  
呼童折向幽房去  
紙帳三更照獨眠  
先生以名解元隱跡山中宜廣寒仙子之下降也

# 紅香仙子

一士召仙有女鬼自稱紅香仙子附牘作  
詞云浙零零一座芭蕉老靜沉沉一帶紗  
窗香慘離離一陣鴻聲悄思量往事件件  
都弄了不甘心小軸畫蛾眉蟲也欺人蛛  
網重相擾展長天難打相思稿拂濃雲難  
覓傳書鳥關重壞難種忘憂草酒杯頻勸  
怎禁寬腸少早知道癡意與癡心總不相

千只是無情好

狐柳妖

狐能幻化往往變爲女子艷容巧慧情愛  
惑人楚士汪明遇曾遇之一日泣別贈詩  
云鉛華久御向人間相對鉛華更慘然縱  
有青青今夜月何因重照舊雲鬟○柳妖  
贈別詩仲冬二八是良時江上多緣與子  
期今日臨岐一盃酒共君千里遠相思

劉山叟訪女

後唐莊宗劉后少困兵亂與父相失後貴  
寵其父山叟負藥筐詣宮門請見時諸嬪  
御爭以門第相高后恐爲已辱乃曰我離  
家時父已亡矣安得有是命驅出之莊宗  
常於宮中敝服攜筐裝劉山叟訪女以爲  
戲瞿宗吉詩云同光天子尙豪奢后族多  
稱富貴家山叟不知人事改摩娑老眼入

京華

花樣不同

盧仝下第出都投逆旅有人附火吟曰學  
織錦綾工未多亂投機杼錯拋梭若教官  
錦行家見把似文章笑殺他仝問之荅云  
舊隸宮錦坊近以薄技投本行云如今花  
樣不同且東歸也

下第集句

石曼卿下第偶成集句曰一生不得文章  
力欲上青天未有因聖主不勞千里召姮  
娥可借一枝春鳳凰詔下雖沾命豺虎叢  
中也立身啼到血流無用處着朱騎馬是  
何人又集絕句云年去年來去忙爲他  
人作嫁衣裳仰天大笑出門去獨對春風  
舞一場

人心難足



葵軒瑣記有人心難足歌云終日奔波只  
爲飢才教食足又思衣衣食若還多充足  
洞房衾冷便思妻娶得妻來鴛被煖奈何  
送老恐無兒有妻有子雙雙樂終日思量  
屋舍低起得高樓并大廈又無官職受人  
欺縣丞主簿皆嫌小欲去朝中掛紫衣人  
心似海何時滿柰被閻羅下帖追此言雖  
俚實切人情

聽讒詩

世傳聽讒詩云讒言謹莫聽聽之禍殃結  
君聽臣當誅父聽子當決夫妻聽之離兄  
弟聽之別朋友聽之疎骨肉聽之絕堂堂  
八尺軀莫聽三寸舌舌上有龍泉殺人不  
見血不知何人所作詞意明切

朝鮮國人

卓異記朝鮮國人遇風飄至通州有司館

於守禦所訊之乃其國差出主試者因作  
詩云白浪滔滔水接空布帆十幅不禁風  
此來若葬江魚腹萬里孤臣一夢中又跡  
殊溺海唐王勃事異投江楚屈平後因進  
貢使之歸國

楊誠齋詩

河圖三畫已剩却堯典萬言猶欠着向來  
潛聖天何言六經非渠一手作杏壇花下

撥不開天公更遣麒麟催乾坤造化登青  
竹洙泗光芒付綠苔堂上書生真苦相蠹  
簡嚼穿渾不放屋上架屋更屋上後千萬  
年作何樣華元夜登子反床華鏗晨趨孔  
子堂當時浪說拆骸骨今日顰思雕肺腸  
華君將身博凍餒毛穎何罪終日忙君不  
見老農驅牛耕隴頭稻雲割盡牛亦休毛  
穎爲君禿盡髮問君何時放渠歇短檠青

燈明復滅詩話云華鎧漢時秀才作六經  
解楊誠齋書長句於後思致甚巧末意黯  
然。誠齋又有句云書莫讀詩莫吟讀書  
兩眼枯見骨吟詩个字嘔出心人言讀書  
樂人言吟詩好口吻長作秋蟲聲只令君  
瘦令君老何如閉目坐齋房下簾掃地自  
焚香聽兩聽風都有味健來卽行倦卽睡  
句老而佳

無名詩

群談採餘載二詩云浩如烟海積如山紙  
上陳人叫不還白首書生無事業一生精  
力費窻間鄰壁嘲啾謂學而老人睡少  
聽移時他年慎勿如張禹帝問床前謬不  
知二詩句意俱好又古潭詩云詩書已後  
真多事已矣洪蒙喚不同荷蕢那知夫子  
意夏冬曾笑伏羲來先天一畫無餘卦六

籍千年有冷灰豈是世間文字少新編後  
傳逐年開

詩意相似

晁以道與陳叔易俱隱嵩山叔易被召以  
道作詩寓意云處士何人爲作牙盡攜猿  
霍上京華故山巖壑應惆悵六六峰前只  
一家籍溪胡原仲除正字朱文公寄詩云  
先生去上芸香閣閣老新裁豸角冠留取

幽人卧空谷一川風月要人看二詩相似

觀潮

崑山風俗以八月十八日爲潮生日合邑  
往東門觀潮弘治甲子顧鼎臣觀潮詩云  
海若鞭潮出海門霆奔雪捲帶靈氛六鰲  
駕撼三山動萬馬聲傳百谷聞應識更期  
人似玉往觀誰使女如雲傳巖舟楫真時  
用康濟功成日未曛乙丑大魁天下



釘詩

丁大全面藍色開慶已未因貂聯董宋臣  
得相不愜人望江西繆萬年作釘詩刺之  
云頑鑛非銅鋼樣堅寒坑纔熟便趨炎千  
來搥打方成器一得人拈卽逞尖不怕斧  
敲惟要入全憑鑽引任教嫌休言深久難  
拙拔自有羊蹄與鐵鉗大全見之大怒配  
繆化州後大全竄新州爲監押者擠水死

四不出

孔侍郎極朝回遇雨避於一叟之廬下延  
入廳事叟易衣紗巾逢迎甚恭因備酒饌  
一一精好孔公借油衣叟曰甚寒不出熱  
不出風不出雨不出未嘗置油衣也孔公  
不覺頓忘宦情

登瀛詩

東軒筆記程師孟知洪州于府中作靜堂

自愛之無日不到題詩千石有每日更忙  
須一到夜深常自點燈來之句李元規見  
而笑曰此無乃登溷詩乎

萬回萬拜

姑蘇筆記薛昂賦蔡京君臣慶會閣詩云  
建時可會真千載拜賜應湏更萬回時人  
謂之薛萬回賈似道柄國時浙漕朱浚每  
有劄子稟事必稱浚萬拜時人謂之朱萬

拜浚乃晦翁曾孫後元兵入建寧浚被執  
不降曰豈有晦翁孫而失節者乎遂自殺

### 王琪張亢

渾水燕談錄王琪張亢同在晏元獻幕亢  
肥大琪以太牢目之琪瘦小亢以獼猴目  
之一日有米綱至八百里村水淺當剥載  
亢往督琪曰所謂八百里剥也亢曰未若  
三千年精矣又琪嘗嘲亢曰張亢觸牆成

八字亢應聲曰王琪望月叫三聲

鵲且打鳳

今是堂手錄杜大中自行伍爲相與物無  
情西人呼爲杜大蟲雖妻有過亦杖之有  
愛妾才色俱美大中賤表皆其所爲一日  
大中方寢妾見几間紙筆頗佳因書臨江  
仙一闕有彩鳳隨鵲之語大中覺而見之  
云鵲且打鳳於是掌其面至項折而斃

姓伍相美

封氏聞見錄楊伯博任山南縣丞其妻陸氏名家女也縣令朱某婦姓伍偶諸官婦會席既相見縣令婦問贊府夫人何姓荅曰姓陸次問主簿夫人荅曰姓戚縣令婦勃然入內諸夫人不知所以欲回朱聞之入問其婦婦曰贊府夫人云姓陸主簿夫人云姓戚以吾姓伍故相美耳其餘夫人

賴我不問若問必曰姓八姓九矣朱大笑  
曰人各有姓豈相美邪令婦復出主宴

羅江雞卵

儒林公議慶曆中宋禧爲侍御史性廉介  
乏才幹時親事官謀亂夜入禁中幾致不  
測旣而擒獲上驚悸原飭宿衛禧上言請  
多市羅江獾狗置內以備守禦人傳以爲  
笑目爲羅江御史○林居漫錄桐江朱應

昌有口才好術數巡撫東省時倭寇朝鮮  
警報旁午朱檄登萊兩府各收雞卵數十  
萬俟倭乘舟來我以卵擲之舟滑跣立不  
住悉成擒矣聞者傳以爲笑目爲雞卵巡  
撫內閣趙志臯獨奇之擢爲少司馬總督  
征倭軍務是以國事爲戲也禧與應昌二  
事畧同怡又同姓更奇

池中飛來



揮塵錄毛澤民受知於曾子宣布子宣南  
遷澤民坐黨與得罪流落久之蔡元度鎮  
潤州與澤民俱臨川王氏婿澤民傾心事  
之一日家集觀池中鴛鴦元度賦詩末句  
云莫學飢鷹飽便飛澤民和之云貪戀恩  
波未肯飛元度夫人聞之笑云豈非適從  
曾相公池中飛過來者耶澤民大慙不能  
舉首

儒匠

有木匠頗知通文自稱儒匠嘗督工於道  
院一道士戲曰匠稱儒匠君子儒小人儒  
匠遽應曰人號道人餓鬼道畜生道

楊鑾詩

西清詩話南唐楊鑾性詼諧戲作詩云白  
日蒼蠅滿飯盤夜間蚊子又成團每到更  
深人靜後足來頭上咬楊鑾

殘羊會客

青箱雜記彭齊未第時常謁南豐宰宰不  
喜士平居未嘗展禮一夕虎入縣廨怪所  
畜羊乘殘而去宰卽以會客彭亦預翌日  
彭獻詩謝曰昨夜黃斑入縣來分明踪跡  
印蒼苔幾多道德驅難去些子猪羊引便  
來令尹聲聲言有過錄公口口道無災思  
量也解開束開留取頭蹄待秀才南方謂

押司錄事爲錄公覽者絕例

衆易欣有托

中興間氣集唐名妓李秀蘭善滑稽嘗與  
諸賢會易程開元寺知河間府劉長卿有  
陰疾謂謂之曰山氣日久佳長卿曰衆  
易欣有托舉坐大笑論者兩美之

草明堂赦文

山堂肆考宋胡衛盧舉在翰林草明堂赦

文江淮盡掃于胡塵太學生嘲之曰胡塵  
已被江淮掃却道江淮盡掃於傳語胡蘆  
一學士不如依樣畫葫蘆

貧家壁

清異錄臨川李善寧之子十歲能卽席賦  
詩人以貧家壁試之略不構思吟曰椒氣  
何從得燈光鑒處分拖涎來葉飾惟有篆  
愁君按蝸牛一名篆愁君